

Noticia
Transparente
di Gobierno

ISLA ONLINE

Diamars 8 October 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



UNDP a expresa su apreciacion pa e liderazgo di Aruba

PARTICIPACION DI ARUBA NA CUMBRE DI FUTURO NA NACIONAN UNI A DUNA BON RESULTADO

United Nations Development Programme lo yuda Aruba prepara pa e proximo fase di desaroyo den un forma holistico pa yega na un desaroyo sostenibel



Prome Minister Evelyn Wever-Croes a dirigi e delegacion di Reino durante e Cumbre di Futuro (Summit of the Future) na New York cu a tuma luga di 21 te 23 di september 2024. E cumbre a wordo convoca mientras cu e mundo ta confrontando hopi desafio relaciona cu desaroyo sostenibel, paz y seguridad.

OBHETIVONAN DI CUMBRE DI FUTURO NACIONANAN UNI:

- Acelera esfuersonan pa cumpli cu compromisonan internacional existente.
- Responde na desafionan y oportunidadnan emergente cu pasonan concreto.
- Produci un Pacto pa Futuro orienta riba accion cu enfoke riba desaroyo sostenibel, paz y seguridad internacional, ciencia y tecnologia, hobennan y generacionnan futuro, y transformacion di gobernacion global.

UNITED NATIONS DEVELOPMENT PROGRAMME (UNDP)

Durante e cumbre, Prome Minister di Aruba a reuni cu Michelle Muschett, Director Regional di UNDP (United Nations Development Programme) pa e Bureau pa Latinoamerica y Caribe (RBLAC). Señora Muschett a expresa su apreciacion pa e liderazgo di Aruba den maneho di su recuperacion di COVID-19 y e vision y compromiso den implementacion di e Metanan di Desaroyo Sostenibel (SDG).

AYUDO UNDP PA DESAROYO SOSTENIBEL

UNDP a ofrece pa traha riba e resultadonan di e cumbre y yuda Aruba prepara pa su proximo fase di desaroyo den un forma holistico tumando na cuenta e diferente aspectonan necesario pa yega na un desaroyo sostenibel. Pa compromete cu henter e comunidad, Nacionan Uni ta enfatisa pa organisa sesionnan participatorio hunto cu comunidad pa yega na un vision nobo pa futuro di Aruba, dirigi na desafionan y realidadnan di e pais.

CON UNDP LO YUDA

Basa riba e obhetivonan di e cumbre y e reunion cu Aruba, UNDP por yuda Aruba den e siguiente manera:

- Diagnostico holistico di e pais: Haci un diagnostico detaya integrando factornan social, economico, y ambiental y promove turismo sostenibel y di calidad.
- Tayer di Consultacion Participativo: Involucra stakeholdernan clave pa co-crea solucionnan sigurando cu comunidad local ta beneficia directamente y ta involvi den procesonan di e decisionnan.
- Sesionnan di repapacion y interpretacion: Anticipa desfionan pa futuro y explora strategianan pa sostenibilidad a largo plazo, enfoca riba crea oportunidad di trabou di calidad preservando recurso natural y cultura di Aruba.
- Desaroya un mapa di ruta delineando punto di entrada di e Metanan di Desaroyo Sostenibel (SDG) y areanan clave pa e aceleracion, enfatisando conexion entre sostenibilidad ambiental, crecimiento economico, y inclusion social.
- Presenta e conclusionnan pa sigura apoyo politico y acuerdo riba e vision y strategia actualisa, enfocando riba e rol di Aruba como un lider den sostenibilidad y equidad riba e escenario mundial.

E plan holisitico aki lo yuda Aruba alinia cu su vision di bira un faro global (lighthouse) di sostenibilidad y innovacion, promoviendo un futuro balansa, resiliente, y prospero pa tur su ciudadanonan. ■■■



Minister Maduro ta atende e '16th Council of Ministers Meeting' di CFATF ARUBA TIN E PRESIDENCIA DI CFAFT Y TA NA DI DOS LUGA DEN CARIBE PA INTEGRIDAD FINANCIERO



Den e diano aki Minister Maduro hunto cu expertonan di Departamento di Legislacion y di e Financial Intelligence Unit Aruba, ta atende e reunionnan di e '16th Council of Ministers Meeting' di CFATF na Miami.

Caribbean Financial Action Task Force (CFATF), ta e organo regional cu ta atende cu e trabounan pa combati labamento di placa y terrorismo, cu e meta pa tene na halto e integridad di e sistema financiero den e Paisnan den Caribe.

Aruba na e momento aki tin e Presidencia di CFATF den persona di sr. Angelo Brete kende ta na cabes di e Financial Intelligence Unit di Aruba conoci antes como MOT Aruba. Aruba tabata na cuna di CFATF ora cu e organo regional aki a keda estableci

na aña 1992 y desde e tempo eyan ta participa activamente den e trabounan. Na aña 2022 CFATF a haci un evaluacion di e sistema financiero di Aruba cu a resulta hopi positivo pa nos Pais. Aruba ta na e di dos luga den di e Paisnan den Caribe cu tin un sistema di integridad financiero halto.

Durante e reunionnan Ministernan di Finansa y 'Attorney Generals' di e Paisnan den e region di Caribe ta reuni pa asina por aproba, entre otro, e presupuesto di e Secretariado di CFATF, ta repasa raportnan di Evaluacion Mutuo di paisnan miembro di CFATF, ta vota pa elegi e Presidencia y Vice Presidencia di CFATF y ta trata otro topiconan cu ta rekeri aprobacion riba nivel ministerial di e miembronan di CFATF.



DETENIDONAN NA KIA LO BAY RICIBI CURSO DI BARBERIA



Recientemente, Minister di Husticia y Asuntonan Social sr. Rocco Tjon tawata presente na KIA pa asina presencia e curso di barberia cu a wordo brinda na nos detenidonan. Pa hopi tempo caba a bin ta inverti den nos instituto coreccional KIA, especificamente pa ofrece esnan cu a comete un fout un segundo oportunidad, y esaki door di brindanan cursonan y trabou pa nan por haya un segundo oportunidad di berdad.

Manera ta conoci, a haci un sondeo bou di tur e detenidonan, pa asina wak kico tin nan interes, pa di e forma ey e cursonan cu nos ta ofrece na nan por conta cu nan participacion. Di e manera aki, e chens cu nan ta logra finalisa e curso aki exitosamente ta mucho mas grandi.

Un di e topiconan cu tin un interes grandi serca e detenidonan ta e parti di barberia y pa e motibo ey, Ministerio di Husticia y Asuntonan Social a wordo acerca pa sr. Lambrinos di Lambrinos barbershop caminda el a duna nan un seminario di tres dia pa siñanan kico e trabou aki ta ensera.

Tres dia sumamente exitoso, caminda a logra scucha di esnan cu a participa na e curso aki, kico nan experiencia tawata ta, di cual a conclui cu e animo tawata hopi halto. Mirando cu e animo t'ey, lo bay percura pa e curso mes bay wordo ofreci na e personanan aki.

E motibo pa cual Ministerio di Husticia y Asuntonan Social ta kere den e cursonan aki ta, door di haya e curso, nan lo conoce e profesion y lo tin e experiencia caba, pa asina na momento cu nan sali, nan por cuminsa traha. Unabes cu nan tin trabou, e chens ta mas grandi cu nan no ta cay bek den e circulo vicioso.

Por ultimo, e mandatario a manda palabranan di pabien na henter e ekipo di KIA cu a haci esaki posibel, na señor Lambrinos cu a brinda e seminario aki di tres dia largo, como tambe na e participantenan. E tipo di inversionnan aki lo sigui tuma luga e lunanan nos dilanti.





A FIRMA E PLAN DI MANTENCION Y “BEHEEROVEREENKOMST” CU PALO MARGA

Palo Marga lo ricibi 300 mil florin den 5 año



Recientemente, Minister di Deporte a anuncia cu diasabra ultimo, dilanti un publico grandi durante di dos (2) anochi di e Caribbean Shootout 2024 conhuntamente cu e representantenan di ABM y Lotto pa Deporte a firma e “Beheerovereenkomst” y Plan di Mantencion. Ta trata aki di un acuerdo di cinco (5) año cu Fundacion Lotto pa Deporte pa e financiamiento pa cu mantencion di ekipo y facilidad na Palo Marga.

Ta trata di un suma di 60 mil florin pa año pa asina ABM por mantene e facilidad den bon condicion y garantisa di e forma aki e operacion optimal y safe di e pista pa practica e deporte di motor. En total Palo Marga lo ricibi 300 mil florin den 5 año. Un plan hopi detaya a wordo prepara pa e personal di DOW y diferente experto pa mantencion di e pista.

A instala 26 poste di luz LED ultramoderno, cual ta un inversion di casi 400 mil florin. Ademas di esaki, a renoba e pista di Palo Marga den su totalidad cu un “race asphalt mix”, a trece Sr. Kurt Johnson di Total Venue Concepts y su ekiponan special Aruba. Awe Aruba tin e miho pista di region y acredita na standard internacional. E proyecto di renobacion di e pista ta un inversion di 1.9 milyon florin.

“Desde cu Palo Marga a wordo inaugura na año 1983 door di Sr. Betico Croes (den feliz memoria) e no ricibi mantencion y no a wordo renoba mas. Te 41 año despues, nos a haci e renobacion di Palo Marga, paso tin un grupo grandi cu ta stima e deporte di velocidad,” Minister Endy Croes a subraya. Por ultimo, Minister Endy Croes ta felicita Palo Marga y e famia grandi di drag race cu ta stima e deporte aki. ■■■

Minister Endy Croes:

A AUMENTA E SUBSIDIO PA BUKI, BUS, GRM GRAFISCHE REKENMACHINE Y A AGREGA ACERCA UN SUBSIDIO PA LAPTOP Y TABLET



Durante Conferencia di Prensa di Gobierno di Aruba, Minister Endy Croes a anuncia cu lo tin subsidio adicional pa enseñansa. Ta trata aki di subsidio pa buki, bus, GRM grafische rekenmachine y a agrega acerca un subsidio pa laptop y/of tablet pa e hobennan den enseñansa secundario cu tin mester di esaki. Manera ta conoci, varios scol den enseñansa secundario ta cambiando nan “leermiddelen” tradicional existente di buki pa “licentie”. Esaki ta parti di digitalisacion cu ta tumando luga den enseñansa pa cu PEN2030. Na e momento cu cambia pa e “licentie” un di e rekisito pa bay scol ta cu e alumno mester tin un “device” propio. Esaki ta sea un laptop of un tablet cu lo wordo uza pa e por conecta na e plataformanan pa por sigui les na scol. Den pasado e subsidio e tabata cubri buki y/of GRM grafische rekenmachine y “vrije busvervoer” tabata solamente pa e alumnonan di Colegio Arubano. Desde awe, a amplia e maneho pa por cumpra tambe un device (sea laptop of tablet) y esaki ta conta pa tur alumno di scol secundario di cual e scol ta rekeri e uzo di un “device” pa por sigui les.

Minister Endy Croes a logra aumenta e fondo na 400 mil florin pa asina garantiza e hobennan di cual nan mayornan hunto tin un entrada di 42 mil florin of menos pa aña por haci peticion pa

e subsidio. Pa por bin na remarca pa ricibi e subsidio mester subi riba e website di www.ea.aw y busca ariba e pagina “subsidio”. Aki lo encontra un guia completo di tur rekisito, formulario y documento necesario pa por aplica pa e subsidio aki. E hobennan por ricibi un maximo di 550 florin pa e GRM grafische rekenmachine, buki y/of bus y un maximo di 750 florin pa cumpra un laptop of tablet. Ta trata aki di un suma total di 1300 florin pa aña escolar. E website di www.ea.aw lo guia e estudiante cual ta e formularionan cu mester wordo yena y e documentonan cu mester entrega pa bin na remarca. Sesion di Studiefaciliteiten di DEA ta encarga pa atende cu e peticionnan di e studiantenan di Mavo, E.P.B, E.P.I, Havo y Vwo.

Minister Endy Croes a enfatisa cu ta importante pa e hobennan tin e posibilidad pa por yega na extra subsidio. Desde awe caba e estudiante por yena e formulario y solicita pa e subsidio aki. Por ultimo, Minister Endy Croes ta gradici e comision cu a consisti di CBS, hurista, DEA y consehero di Ministerio di Enseñansa cu a traha hunto durante 1 aña, a haci e estudionan necesario y a traha e plan pa realisa e proyecto aki pa nos studiantenan. ■■■

2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

